

LA USC DI LADINS – VENERDÌ 24 AGOSTO 2012

I secred del Latemàr

L'Istitut Cultural Ladin à dat fora na neva regoeta de conties che mena a descorir i secred de n auter lech magich de la Dolomites

Cultura - Dò aer vedù i bie resultac arjonc col picol liber “Dò l troi de la conties” e l percors de descorida tel cher del Ciadenac, l'Istitut Cultural Ladin, co la colaborazion de la Scola de Fascia, tel chèder del projet “La scola te museo”, à dat fora chest istà na neva publicazion dal titol “I secred del Latemàr”. L'é na belota regoeta de conties, enjignèda dai Servijes Educatives del Museo Ladin de Fascia, che mena gregn e picoi a cognoscer n auter lech magich tel gran teritorie de la conties de la Dolomites, apontin l Latemàr.

“Recordà ti documenc antiches

desche “Limidar Alt” - scrif l diretor de l'Istitut ladin Fabio Chiocchetti te la paroles dantfora – gran pera de confin, l Latemàr somea esser jà dai tempes veiores n lech metù ai confins de la ziviltà, levà anter mit e storia, spartì anter entità che personifichèa la natura salvèra e gropes de omegn moec ic enstesc da enteresc contrères: pèstres, minadores, bachegn, boschieres... Te sie cougoi se scon metèi preziousc duré dal pòpul di Morchies, per fèr sù èrmes encantesimèdes e amulec e dapò aló se troa l bol, l minerèl checen che vegnia durà per segnèr i lesc

e i troes.” Dò chisc troes, ogne mèrtesc per dut istà, l personal di Servijes Educatives del Museo Ladin mena jent del post e foresc per ge fèr descorir apontin i lesc e la magies de chisc pòpui veiores.

Te chesta publicazion, che se pel troèr te Museo e te Istitut ladin, se pel lejer di “Salvans del Latemàr”, de “La vivèna del Latemàr”, de “L drach del lach de la Tomera” e autra conties che é states toutes da Karl Felix Wolff, Hugo de Rossi e Giovanni Alton e che é states adatèdes da Fabio Chiocchetti, Martina Chiocchetti e Daniela

Brovadan per poder vegnir aprijièdes ence dai più picoi, e compagnèdes dai bie dessegnes de Fiorella Brunel.

Chesta publicazion, scritta te la verscions ladin/talian e ladin/todesch, fèsc pèrt, ensema a la regoeta dal titol “Dò l troi de la conties” de la medema colana de lejendes per i bec e la va a se jontèr al rich patrimoine de conties per bec de la colana Contaconties. Stories de Salvans, Morchies e Vivènes, stories riches de magia, stories che ne conta di Secrec del Latemàr. (mci)



La soracuerta del liber “I secred del Latemàr”.